

荆
駝
逸
史

錦章圖書局
印行

綱鑑易知錄

卷一百一十五

孫高陽前後督師畧跋

蔡鼎撰

鼎之從愷陽先生也是先生督關之明年癸亥十有一年月也鼎以辛酉受募兵太僕何天玉先生薦壬戌復受薊撫岳石梁先生薦至京居薊募往來京薊間所上當道書言□且死遼可復五星聚張有封建官中赤祥有赦黔犯歲刑主兵不利語聞諸公卿首輔葉文忠先生數引與論邊關大計遂誦言於公時薊為關後勁公倚薊切石梁先生交余密故余不欲舍薊而關是冬岳被言將去送余詣公曰無負兄北來馬足公之初見也曰望兄久矣願聞教言自辰至午披肝洞膈退告幕僚曰蔡子了了人言不謬是午邀閱軍營因論營制又明日邀閱芝蔴灣余曰大海洋洋出奇之地公益屬余又數日邀閱龍虎營營閫卒也予因言用水非此兵不可公優賞之時傾卒言□欲以明年正月之三日假西虜衣服取道喜峯關撫張鳳翼及關門大吏俱遣眷歸商賈相率避去公以詢余余曰水星疾躁法則占□水伏不出□未動也以人事言之相公當即以初三出孟達靜人心口來而精騎在前便可一戰公急決邀余同行余從此始關幕而以師禮事公公令鎮道為余議餼余不可曰書生不宜以口腹取時厭薄為且受餼去留未便公遂不欲屈余而以客禮處余從居孟時西虜以精騎聚孟東要吾拔歸之遼人東謀盡為所得余請與諸將擊之師出大捷然每為公言朝紳當有清流白馬之相欲公留心幹濟留孟者三閱月時

共事競相讒構余嘆曰幕府尚若此何疑輦轂遂辭西歸公欲留之余曰鼎來佐東征耳此間無所用鼎若師以秋行鼎當來赴訂期而別秋入京師聞師期尚遠以僉憲左浮邱先生留因居焉時左禍已不可解十一月發京師詣闕意欲與公密商幹旋之策到關之明日公叱馭西巡余謁曰師西行耶覲聖耶時事大有可商當若為易與以徇之不宜造次公不聽是日公行鹿職方從余與社武庫居守璫疑公與晉陽之甲者時輔共承璫意嚴旨逐公公歸余曰邊塵不驚邊人無可議也惟當急為調停公不聽余鎮道謀曰事與可若是乎入都時乙丑二月也余以軍國大義說南東而別令人為鎮道說當事解乃留公不知也既至告公曰璫烈方張不已撲聞元規汙人為有去耳公為涕泣且陰詢帝星福禍余為著帝星論曰侯星大過於帝而帝患青黑嫌於小弱末云意者星聚河清鳳見璽出欲開中興之泰而丙丁戊己不能無燒劫諫之仄公讀畢嘆曰事至是耶又問璫局曰竟於丁卯公曰何以知之曰楊憲劾璫時歲在辛丑歲末也木數三計其期在丁卯七八月間蓋楊疏發於甲子七月也又問楊左曰歲逆執法二公不免矣相對飲泣後數日余告去公曰何遽舍我曰向以此間有封侯氣欲來為師成之今細察是亂人假竊耳願師勿復言恢復又為吉日攻車說以八月後師行有忌勸公早歸公益泣然余每見方欲啟辭而公已淚出余不敢復言迺以蕭客出幕覓驢徑去時乙丑三月也余去公以七月出右屯九月師渡柳河折前鋒將李永先魯之甲等朝議沸騰公引去公歸而璫以邊

勞開國矣保定舉生祠公不署名事緣未舉璫以怒必中以危余歸璫以左故忘余且謂余持左書囑公興晉陽之甲者余震足山中不交市朝者三年己巳謁公於家時上初政朝端相望太平關督袁公銳以復遼為己任余告公曰時局又當決裂袁趾舉矣禍不遠矣公曰然則奈何余曰秋盡冬來師當再出肩危一切行筭約畧整頓鼎來故為是耳時仲夏五月也六月入都鹿乾岳太常使人來促甚急余過鹿出袁勦馬帥三咨示余嘆曰人情至此勦皇賞勦媚璫勦柳河失事語語彈射且速公余曰固知是兇心死久矣我當一行令彼必易鹿曰袁自戕師已來目中大無忌憚未可嘗試余笑曰彼何能為不吾易吾不歸遂以明日去關袁探得之嚴門者不通以困予往見趙帥語侵之急趙不能堪泣告袁曰三咨不易率教無死所矣無能且謂率教與恩臺寔隘馬以波及師相率教無辭於無能更何不出知余來者邀余余入申明大義諭以師相造就之恩馬帥八拜之盟不可隨俗擠排動以福難禍易前事後師袁無以復曰謹如教言八月還京走書告公曰□來近矣當關者不支必在師通告當事使早為備十月□入天子從當事議起公於家公入對余候公於朝房公曰事果至是耶余曰中外直待師成款耳公曰聞之無能以為何如曰鼎固知師臺不可公為微笑時上方柄用公而一時忌者以通急非公不可逐公公出東便門余追赴之而門已塞矣公繇通去關余後與馬帥至薊欲詣關而□破永平馬曰吾兩人在薊止與關犄角耳何必往關然馬終不能用余故余辭而南□退余以八月

至關時趙帥死○袁坐逆伏法與公相對感泣中朝忌公欲歸公而以遼事任邱撫邱撫亦以遼自任公累疏乞休未允余別公歸京中樞梁公挽余余留京師辛未春梁以沈敏事為御史水嘉允所劾予復至關公班役在京者密稟投公謂梁事且及余毋久居余事平公曰日來雖為兄過計然知兄自不可挽余曰兩年來止以痴腸熱血幾罹不測己己之冬有謂鼎等共詆袁督實為○行間者袁逮又有謂鼎為袁逆黨欲行驅逐者今復爾爾總之行易言殊不當久處冗地留幕府三閱月公每有所條列必咨予尤惕於往日三至之○更加敬慎不復以幕客臨戎矣秋七月告歸公曰無能歸耶如此老病何余曰師歸近矣其歲除乎公曰如此則非好歸余曰遼撫貪鄙輕躁必敗乃事惟師善計時大凌工築方半公意欲留余同省凌工余悚於世路倦飛欲還遂辭公歸而大凌被圍長山喪師則遼撫之為也○退公上疏自列因議改督為撫分關遼薊為守而力請去上允公開蓋是年除月也余歸長卧白門交游罕接乙亥還閩避地更遠丁丑秋嘆曰○禍逼矣踐土食毛誰非臣子豈二十年侈口天下者可於今日遂不與天下同憂即又念高陽城小不可當○乃伏策北上越戊寅春始至定興哭乾岳喬梓告其孫孝廉靜觀曰速自圖毋再及於禍蓋乾岳死定興之難仁卿又痛父以死也時容城孫鍾元者為鹿直客余謂鍾元曰逃將焉往有死而已鍾元蓋公與鹿之老友均北方人傑也丙子○入鹿守定興鍾元守容城公守高陽定興破容城高陽得免二公之力翌日晨至高陽刺入公方盥六世

兄出迎曰師方盥櫛公出喜曰今日可謂出於望外數年懷想無由得面去歲林掌科正
亨來詢兄動定云相去遠雖知名尚不能詳晨起得刺心動然謂兄未必至此急欲得名
閱之方盥手濕令家人代轉揭轉悞不可得及得人躍起今日可謂出於望外而精神
矍鑠意氣沉雄殊不減癸亥甲子時至於目破蠅頭飯常兼人則余不及焉公亦謂余不
類昔時瘦削者以次問舍弟詢小兒詢前日諸廝大都如家人父子言言相悉事事圖度
竟三晝夜不少懈余別公曰鼎老且貧不可再至且干戈浸淫南北將梗亦斷不能再至
以鼎愚淺朝廷國勢大有可慮又慮今秋□來師臺此城如何可守故不遠萬里持來相
告願師善計公曰守則守耳餘亦無計相對黯然而出所哭鹿乾岳詩百首示余余退謂
四世兄咸若曰斯誠難守兄等如何為計余言止矣咸若曰兄豈不知老師前非吾輩所
敢出口者天若助明決無可慮余遂不復言計入都與當事謀起公於朝如己已然用以
脫公而濟天下及抵都大司寇鄭公元嶽逮大司農程公我旋大司馬楊公文弱避客不
面惟廷尉王公虞石今大學士前少司空蔡公靜源頗善余言款議起余上書司馬門深
言不可掌料何楷疏劾非是司馬咎予饒舌隱隱不相容矣余說不行痛哭南歸聞者尚
疑余過激時季夏初旬也京畿大水次新城雄縣者各數日告張於度王北愚劉士望諸
公謹備口且寄諸靜觀鍾元云望舟人安舟去高陽一舍地盜劫從橫州人相戒不敢出
戶復痛哭而南後錢牧齋過公公問曰無能在京每書言來何竟不到錢曰正自不解冬

○
余入虞山錢以公言告余余方作報仗錢為達而高陽監視大臣罵口慘死合門就義之報至矣容城任印雄縣新城同日報陷於度諸公又不知何如矣痛哉余痛哭數日眼為之爛牧齋來約余入虞山為位哭師因以前後督師畧屬余余刪煩摘要為萬五千言用以信今垂後因題其簡末如此

東陽兵變

許都浙江東陽縣人故副都御史宏綱之孫也任俠好義遠近信服縣令姚孫棐貪虐殘民借名備亂橫派各戶輸金而坐都以萬都家實中產勉輸數百金詣自告竭孫棐大怒摘都所刻社稿姓氏謂是結黨造反桎梏之時輸金者盈庭閤然沸亂有姚生者執孫棐於座按之街下笞之羣擁許都為主巡按御史左光先聞變即調台州兵行勸所至層掠東陽湯溪蘭溪民各保鄉寨拒敵官兵大敗光先遂以許都反聞集兵處餉人人倖功杭州推官陳子龍謂都實非反者遣生員蔣若來賫書諭之都即率同事十三人詣杭獄投子龍為之請光先不許悉斬之盡隱孫棐之過命之復任此崇禎十七年正二月間事

閩游月記卷一

華廷獻撰

粵在甲申之年建辰之月徂茲以往尚忍言哉金陵鼎新延及閩粵於是乙酉丙戌以來之事可得而紀也余以申夏除服遭遇世變躬耕養母志在首邱分固應爾會中興露布衆正盈廷今殉難家銓部公迫於推轂起秉藻鑑郵筒三及謂一成一旅政賢者所當盡力毋自暴棄遂策蹇白門寓神樂觀憶奔走南北金陵凡數游卒卒無暇茲得縱觀壇壝顧瞻郊廟紺瓦飛塵丹楹委翠乾坤並峙而高皇帝配享於昭攝衣而上骨戰肌栗悲來填胸與一時賢豪長者指畫陟降約略進反如在循牆遇璫之列也几榻如玉雕鏤亦非近代云是齊梁間物喬木古怪如虬龍舞鶴非復人間氣象出而散步林莽一望邱墟昔人所云楸梧遠近千官塚禾黍高低六代宮又增一番圖繪矣俄而虹蜺揚輝借靈煬灶家銓部已指日謝事而苞苴盛行某地某行人先期嘖嘖余固株守遂得滇缺隨厯階上松以親老辭賦遂初矣無何而物議沸騰價高倍約者甚至閩堂質明長至散班鄉大老要太宰於朝門而語之曰此番選事云何服闋例得優補況減俸紀錄如某人之滇缺亦其一也時言路諸公以選法不倫至質主爵於道周而引某人為口實主爵為之語塞徐應曰有故事可改也至逼除而補閩汀之歸化歸化古明溪地也計程幾及二千自幸謂可將母迨問途已經僉謂不減蜀道陸則峻嶺水則危灘老母素畏輕舟頗有難色意欲

一往武陵繼續就道時憑限已逾斧資羞澀至三月二十後始克就道寓湖樓屈指二十
卜舊游則招慶回祿後日淒涼矣惟西廊一帶僅存愴然黍離之感散步知堤遇青衣林
立者且前且却同人笑指曰爾輩非閩役來近者耶是也從錫而來也憊矣具道陰雨纏
綿溪流湍急狀而北堂歸志決矣且持邑士紳寮佐啟箋請兼程往遂於四月朔奉母禮
三竺携子謁法相而默禱於忠肅公祠昔年祈夢地也次早拜別膝下囑昆季隨母南還
而與眷屬二十四人買兩舟渡錢塘中流分左右一上一下一謂之兩浙江過此則嚴江遠
望一村塢不見城郭舟子曰此桐廬也水清澈底游魚可數婦女爭取五色石舟幾覆至
七里灘江流漸狹名雖云江其實是澗峰巒迴合前若無路兩舟不相望行到水窮忽然
山轉則叢叢烟雨中釣臺在焉石壁插天望祠堂如天上先生之風山高水長實向往之
矣逆流而上七日抵青湖舍舟登陸過仙霞嶺嶺百四十里陟降凡兩程峭壁中間隘口
盈丈俯高臨下百人守隘千夫莫能過也自意東南半壁此其干城詎謂僨帥驕兵豕奔
糜爛一旦開闕揖敵雖坦途不是過矣絕頂神祠旁為公館烟霞皆生足下真稱奇絕石
坊有浙閩分疆四字下此則閩境矣時重陰彌月忽又傾盆肩輿不蔽風雨遍體淋漓陡
石危潭隨瀑布而下輿人舉步千斤其輕者掉而前重者落落在後相去四五里望既目
迷招呼聲亦漸杳千山昏黑風雨猛烈一電光舉數武約離浦城四十里度前去者亦不
能達僅與弱妻稚子一僕兩役止山崖草庵頽樓上下對灶燎衣餘俱不知去向中馬如

割命兩役持野燒追踪或云盜賊在前或云豺虎在後亦無可奈何耳質明雨歇行二十里始知先驅者止一村落母女相見且泣且語曰人言宦游樂此是矣抵浦城而同選鄭公為虹已到月餘彼此僅一謁旋買舟舟可容五六人形如綉鞵號流清船甫解維而長年變色謂此番水漲百倍往昔所云將軍灘老虎浜頃刻萬狀至佛閣脚則前舟已覆急挽就陸覓四五乘半循涯半冒險石岸斷續幾瀕於殆三日抵建甯東南都會也二日抵延平過黯淡灘灘頗長水勢不甚騰躍不識鄭虎臣作何恐怖耳至大中寺則邑之胥吏里排集焉前任為蜀中趙公昱我邑舊父母也時已陞部離任月餘與直指梅谷吳公同誼直指方按延留以候代而予與直指同世講先得見於維桑屬余家信故事未接例難報謁適趙父母修尺牘近於途且持力至謂直指已得台踪走承舍領家信甚急期以質明見見則云舊任賢者就此交盤有僕在無難色啼吁謂揆闔闔於穴以中朝為孤注江南累卵相對黯結久之出而趙公候於八角樓矣府城一半是山樓臨澗上為冠蓋公所有峰迴壑轉之額洵不誣也至則新舊諸役相向持清冊數帙一揖而交盤矣余領直指意姑留記室不虞其後之費手也由順昌從陸至白蓮驛東為將樂西為歸化時清和將盡或云例忌月杪或云例忌五月余總不暇顧遂於朔日蒞任孤城斗絕四面皆山憶初至甯城遇王子房每諷一片孤城萬仞山之句今再諷矣近邑為鐵嶺山形相峙如龜蛇龜山先生廬舍邱隴依稀在焉語在龜山祠序中更憶甯為昌黎故里愚至譚

劣抑何與前哲有緣耶邑有三異邑治皆南向此獨北向以山形拱峙之故一異也文廟皆城內此獨去城四里許以璧水盤旋之故二異也東南兩關水聲潺潺不絕橫亘邑中而不通舟楫紆曲沮洳者二十里始達河故自將樂至清流往往從陸三異也邑有四難原賦萬餘而加增至倍編四十里輸將并責里長多借絕丁逃戶以子衿奴塞催科一難也公務倚辦里長里長倚辦借支送舊接新眷屬來往費至二三百金交盤察盤公開借庫補庫名色借者冒破補者無期二難也郊外有墟三六九有集不過布帛菽粟而上司供應多用犀象珠貝名為廣貨雖亂以來阻且修矣而責者如故三難也里鮮絃誦聲而饗序至五六百中不乏自好然掉臂街衢連袂公庭者不少試則匿名蜚語訟則捲堂哭廟以為常予幸獲免而夙習相沿巧者穿鼻拙者含沙四難也而余有數奇者五到任後例謁諸上臺費不貲而建牙張公以年家誼屬直指為言岩邑無煩遠涉會汙守被勘新任後期以故明溪半載未嘗一識府門自謂此事差快人意至六月而黃都司之事起矣時建李高子靜察盤至邑携直指手書翠華有移駐臨安之信長江失守可知方羣疑滿腹忽衙前轟聲如雷諸生擁一武弁於憲門弁稱都司黃晉奉撫院委造軍器貽府庫諸生言昨在清流激變宵遁今晨西關不納彎弓相向隨行一僧四僕俱猙獰異時寇氛震隣因江李趙公於甯化方嚴盤詰此為奸細無疑請同察盤梟示以寒賊胆余索其憲檄則云并貽府庫高公詔之入長揖不跪檢其篋有快靴腰劍高公謂此時此地行而

無驗亦自取之殃遂錮之兩廂申府定奪余密詢陶清流答札云此弁潛上李生家李素以通賊為邑所側目次早來治投刺羣起攻之其從者露刃國人遂殺李生火其家故踰蹌而奔隣境也高公見札行縣羈候申院定奪數日而府文至則貽器是實弁得釋揚揚謂司李羈禁出縣官指必報仇徧控當道幸張鯢公見諒手示慰勞有時艱加旻具見丰稜之語謀始息數奇一俄而陳主簿之事又起矣是日察盤將起行忽衙前轟聲如昨則陳簿與張元鬪毆而士民攻之也陳簿者名訓江北籍不知何等人也素持正官短長例轉幕衛繼棧久矣而張元者汀李之積蠹也素橫屬邑已酤酒向簿索娼角口至裂冠毀帶各飽老拳時囂於悍卒多祖簿鼓煽達邇而張役已負公惡感欲得而甘心焉聚而鬪於察盤之門予謂簿即無行非役之所宜辱高亦云然因羈役候詳衆始解是役也非羈候幾不免高公目擊情事致書汀李宜懲此役汀李者今高州守餘姚趙君最也中於單詞以高言為河漢謂簿倚令以聳察盤而縣詳曲庇之深文再四字字針鋒予始而疑徐而悟蓋在任兩月適汀李署甯化篆既未謀面僅投空函及承先施而未遑修候也檄簿提詢簿始自言不宜久戀地方暮夜赴省矣迨汀李擢樞曹攝道篆過縣親讞檄開差役前往嘉興候項座主有杯幣書儀并寄家俸金條簿搶却不宜縱面諭諄諄於公帑取償而責簿追補予一一代為道地又撻其父械其僕所不至死者以勸阻之故而簿慮補庫固謂予坐視又擠之下石焉恨刺骨至騰謗省城投揭於曾公祖閣部何黃如司馬兩公

正色曰循吏安得爾而舊汀李方改館選相與斥而逐之至是則汀李之疑釋而簿猶未釋也數奇二閏六月接直指書謂天下事遂至此言念家國北望洒淚巡汀之期未可問也會邑簿陳王道自京口來任云六月朔過錫城市闐然至舍索家信一老閩人言家避南塘再詢之適矣因紆道跡某處得家信而來也啟函時手欲顫舉家相顧失色始知有五月十三之事老親以先期入鄉仰天額手矣頗傳鄭帥鴻遠數乘過鄭嶺中有真主俄而百官郊迎時閩中有大鄭二鄭之目二鄭守金山遇敵而潰會唐藩以恩詔出中都聞變渡江邂逅於京口塵埃物色引與俱東稱監國王王雅好圖書喜翰墨有河間獻王風傳檄手書先述世系後及時艱痛天潢之慘裂張王室於顛隲一稱張鮑淵先生一稱吳梅谷先生方諸劉祖比於溫陶纚纚千言捧之嗚咽即監國位於省城越旬而登極議起諸老以監國名正出闕尺寸建號未遲示中外無利天下心李侍御長倩伸其說大鄭亦云然而擁入者艷蚬戴功謂此時非大號無以壓衆心而杜後起遂定議頒詔而鄭俱列侯按陞撫撫陞樞一命以上咸與寵錫焉於是敷求耆碩如蔣八公朱允岡黃跨千曹能始何黃如諸公咸在列而蘇觀生最信任如曾二芸郭維經何香山葉廷桂等以次至改福省為天興府庶吉士為庶萃士以天興延興為上游汀邵漳泉為下游各設撫按有為重望領兵之說者大鄭首推黃石齋公席未煖而行公大儒高冠深衣臨敵不避難曉以大義遂被創至留都死之有為亂國重典之說時吳郡守收煒朱司李健以南安王入境

疑敵兵移着他駐坐倡逃施建陽燬以奸胥發坐貪酷俱駢斬市曹上頗右文而五侯七貴朱輪闊風何公以爭朝班乞歸至中途為誰何者擊幾斃舊撫請告謝任吳公為大司馬時所在擁藩紛紛樹幟孫嘉績方達年鄭公子捐貲募士保魯藩於會稽勢在肘腋勸駕著謁江東子弟望王師若時雨遲則解體且恐祖鞭先著章滿公車日中未決意欲先嚴內治播告遐邇於是八郡一州拭目新政矣而前此兩月無君崔蒲蠱起又南贛汀韶地界三省深山幽谷皆賊淵藪其穴為簾子洞累朝莫窮有閩王總猪婆營二種若干年矣歲掠村鎮名為採糧邇聞京都淪沒巨胆滔天俄而逼郊圻矣俄而攻城池矣武平沙縣是處見告適王司道芋奉命辦賊語予曰初意小醜易與耳及覘舉動不減西賊奈何八月朔逼沙縣接壤為紫霞山蕭族素盛忽貲即來控謂寇已鈔山東無去路意必向城急料理城守而百年來人不知兵什無一具邑有娘娘廟以滅賊成神載邑志祈禱輒應卜云此番無恙後益甚予集紳士而矢於神曰徒手而搏不教而戰從古所戒此地非賊久留惟固守以俟其退可尾而擊也添官兵募鄉勇可三百人簡積庫搜民間人得一器糧糗出之預應火藥取之射鳥自哂書生說劍不啻武事中綿叢也賊約二十日破一鎮蕭陳諸友被擄入營詢是在庠與坐飲食勒令贖身或四五十金少至數金携信家屬取償乃返各村擔負耄倪肩摩城闐號呼不絕救之則顧奴失主委之獨非赤子乎邑鮮縉紳惟兩曾孝廉及勲丞貲帙數人而迂儒負氣僉曰戰乃可守余謂關頭距城數里至此

則勢在必救十三日掠關頭村諸生憤憤請行予以兵無紀律毋乃以性命為兒戲止宜
揚兵城外勿遠離於是陳三尹慨然誓師冀得一當驅市人而出望見賊兵手招蕭生打
話蕭善詞令廣交游在賊營頗見禮合城趣之行蕭生請命予曰諸君謂戰乃可守今忽
議撫耶城下之盟非敢聞命僉謂如合城性命何情甚迫予語蕭生汝即往姑款之以需
大兵可也生往如前則營皆鄭幟固謂儂係閑兵有便宜借糧之檄並非犯禁何為截路
沙縣犒兵千金亦爾則當假途城外戒勿近壕謹候命蕭生歸告其邑父老父老曰城守
令公事郊勞我輩事也盍謀所以為牛酒資者令蕭生懷壁夜行竟如約次早我兵繞城
而列陳三尹率兵據高阜為犄角賊果迺運而來城上刁斗無聲忽苗頭突至壕邊我兵
擒而殺之令蕭生責其背約賊轉而西與陳三尹兵相持於岩阿遂望武平一路而去此
八月十七日事也竟以此斷送中秋矣數奇三後武平城破被逮予與上杭羅文正以城
守加試主事銜照舊管事乃陳三尹竟為禦賊墜澗一僕被殺歸衙半月憂悸而卒予經
紀其後事旅魄淒然雖蝸名蟻秩乎其沒於王事一也余即唇焦頰禿而天聽彌高誰為
起死人而肉白骨者昌黎所言遠方小吏不能自達而轉於溝壑可勝道哉抑猶是陳三
尹也一則戀棧而漏網一則見危而捐軀兩人何霄壤也明溪兩峰左白蓮右九華素稱
騷擾近楊機部萬吉人以閣部銜大振義旅勸駕幸贛兵垣楊又如勸幸楚甸何蘇二相
勸幸粵踉蹌滿路益疲於奔命又附郭有酒水岩怪石仙踪遊軒過者每借片晷以探奇

予於重九日獲一追隨俄報守道于華王之任上杭矣予係舊甯化弟毆府廳毆庠友而亦時見毆於上官庠友武弁又以為固然其天性也至則叙同鄉親誼余謝不敢又叙庚辰譜誼益謝不敢徐而吐露心腹謂中途被劫行李蕭然車馬輕裘可共敝乎予惟力是視忻然別去至十一月張兵部應星使滇過邑張係恩選雙眸炯炯習識緯工劍術滇南人也以州守軍功擢部貴詔沐府敕令沿途奏報凡地方情形人民吏治得舉所知傾蓋間恨相見之晚唏吁時事謂廷議缺兵招安反側令守關自贖隨地打糧命田憲副關統之名為官賊於是素稱賊渠者儼然搖扇拜客有司抗禮而道路以目莫可誰何自是星輅兩地檄不辨其是兵是賊而風鶴無虛日矣頗聞前途兵阻暫爾淹留長至之夜宴於後堂忽報賊攻清流炮穿雉堞張公謂不惟阻我去路勢必犯境我雖過客而眷屬在城義無退避利害禍福請與君共之吾有二弁數僕皆膂力無憂也至是而神言果驗予與張公集紳士而瀝血於神曰狡賊再犯勢不俱生敢私通往來者有如此盟由是衆志成城平日囂衿悍卒頗得其力先是設為門禁囊石濠邊者始炤入已積石如山矣庠友百人就近輪值晝司盤詰夜司巡燎初七日賊過清流屯九華駟駒去城六十里一面申請大兵一面堅壁清野議毀沼城房屋而羣情顧惜謂臨時一炬未遲駟更奔竄謂賊舍駟他往張公曰必從間而來此時可以一炬矣急壘石四門是夜火光不絕至黎明而賊騎徧西關掠飲食環營行作陣勢張公登陴謂此赤脚陣如馬足裹鉄單裙白扇為記履